

Gheibh sinn ann cnothan is caoran,
 Is gheibh sinn ann braonain gu leoir,
 Is deareagan-fithich air fraoch-bheinn,
 'S cha déid sinn 'n traigh mhaoraich ri
 'r beò.

Gheibh sinn ann bradan an tarra-ghéal,
 A thig oirnn o 'n fhairge na 'n steall:
 Le slataibh 's le morghaibh ga 'n ruagadh;
 'S bu toigh le daoine 'uaise bhith ann.

'S coma leinn cur agus cliathadh,
 'S cha treabh sinn am bliadhna le crann;
 'S ann bhios sinn 'sa mhaduinn ag iasgach,
 'S mu fheasgar a fiadhach nam beann.

Ged nach fheil sguab anns an t-sabhal,
 No caora. no gobhar, no meann,
 'S ged nach fheil bó ann ri 'bleoghann,
 Bidh dùil ri sar chobhair nam beann.

Nuair thig na gillea mu anmoch,
 'S a leagas iad eallachan mu seach,
 Cha chluinnear guth aca de sheanachas
 Ach mar a shealg iad an damh.

Am fac thu mar thill an cù ruadh e?
 Am fac thu mar bhuail e 'n cù glas?
 Thilg e a ludhran a suas air
 Cho ealamh 'sa bhuaileadh an t-srad.

Nam faicadh tu mis' agus Sinteag
 Air còmhuard na frithe so shios,
 Gun duine, gun ghunna, na 'r còir ann;
 Gun nì gu ar còmhnaidh ach sgian.

Cha dean mi faoin ghleadhraich no bòsd
 uim',
 Chaidh mise na chròicean gu dian,
 'S chaidh ise gu h-ealamh na sgòrnan
 Mun d' fhuairadh leinn seòl air 'chur sios.